

Prihvaćen prijedlog sarajevskog Tužilaštva



Droga nađena u vozilu: Privođenje osumnjičenih u Tužilaštvo

Uhapšeni u akciji Glečer ostaju iza rešetaka

Kantonalni sud u Sarajevu prihvatio je prijedlog sarajevskog Kantonalnog tužilaštva, te Elvedinu Zemaniću, Samiru Kondi, Mirzi Mahoviću i Samiru Misiću, koji su početkom avgusta uhapšeni u sklopu akcije kodnog naziva Glečer, produžio pritvor za još dva mjeseca, potvrđeno nam je iz ove pravosudne institucije.

Rješenjem koje je Sud donio na ročištu održanom prošle sedmice, pritvor osumnjičenim može trajati do 3. novembra ili do nove sudske odluke.

Podsjetimo, službenici SIPA su 4. avgusta, po naredbama sarajevskog Tužilaštva i Suda, uhapsili Zemanića, Kondu, Mahovića i Misića zbog sumnje da su se kao organizovana kriminalna grupa bavili neovlaštenom proizvodnjom i prometom opojnih droga.

U sklopu ove akcije je pretreseno više lokacija u Sarajevu, a pronađeno je i oduzeto pet kilograma marihuane-skank, te kilogram spida. Akcija je izvedena po naredbama Kantonalnog suda u Sarajevu i sarajevskog Kantonalnog tužilaštva, a pretreseno je vi-

še objekata na više lokacija s ciljem pronalaska predmeta koji mogu poslužiti kao dokaz u daljem postupku. Uviđajem na mjestu pronalaska zaplijenjene droge rukovodila je postupajuća tužiteljica sarajevskog Tužilaštva.

Elvedin Zemanić je tada, podsjetimo, negirao da ima ikakve veze sa krivičnim djelom koje mu se stavlja na teret, te je tvrdio da je samo ponudio prevoz do Stupa rođaku Mahoviću, koji ga je nazvao jer mu se pokvario automobil.

Navodno je njegove navode potvrdio i Mahović, koji je sa sobom imao torbu u kojoj je pronađena droga.

Zemanić se, kako smo ranije objavili, i ranije više puta dovodio u vezu sa nizom incidenata, tuča i pucnjava u Sarajevu, a u oktobru 2012. godine je hapšen u akciji sarajevske policije zbog preprodaje i posjedovanja droge, kao i nedozvoljenog držanja oružja i eksplozivnih materija.

Tada je policija zaplijenila više od 200 grama heroina, oružje i municiju.

M. M.